

Tin, vola m' rèsponse !

On sèmedi al nét, vola qui l' fi do cinsî mousse è l'èglîje qui l' mèsse èst c'mincîye dispû one dîjin.ne di munutes. Il intère tot doucètemint, pinsant bin n' si nin fé veûy. Mins pont d' chance, li pinteûre di l'uch a crinkî èt l' curé s'a r'toûrné après l' taurdu.

Po-z-ataquer si prêtche, cit'ci l' zî dit :

- Dji vos l'acèrtine, quand vos-arivoz al fièsse mon dès soçons, èt qu' tot l' monde èst d'dja à tauve dispû on momint, vos n'è l'zî fioz nin plaîji, don ! Èt bin, mès djins, c'èst l' minme avou nosse Sègneûr ! C'èst lî rinde bon d'vwêr qui d'yèsse al prumêre munute di s' raploû !'

Tot l' monde a bin compris. Èt nosse djon.ne soçon dimeure su s' tchèyêre, sins moufeter. Mins, tot ravalant s' ratchon, i ratind l' bon momint.

Deûs samwin.nes pus taurd, il aveûve nivé, vos, qui ç' n'èsteûve nin rin di prinde li tiène j'qu'au viladje d'à costé. Portant, li curé dwèt bin zî-aler po dîre li prumêre mèsse do sèmedi, èt riv'nu po l' cène di Vecmont.

On l' ratindeûve dèdja dispû on quârt d'eûre. Vo-l'-la qui mousse èt l' djon.ne cinsî l' riwaîte. Pad'avant tortos, po s' bin fé comprinde, i lî dit :

- Ci n'èst sûremint nin por on véladje, dandjureû, qui vos n'èstoz nin à l'eûre, audjoûrdu !'.

I dit bin l' vraî, li vî spot walon :

« Ni riyoz nin dès maus tchaussîs, i gn-a dès savates po tortos. »

Bernard Van Vynckt

pinteûre = charnière